



Ministarstvo poljoprivrede, šumarstva i vodoprivrede HNŽ-K
Ministarstvo poljoprivrede, šumarstva i vodoprivrede HNK
Министарство пољопривреде, шумарства и водопривреде ХНК

Konkurentski zahtjev broj: 01/26

Broj:01-45-1333-6/26

Mostar:25.08.2026.godine

Na osnovu člana 69. stav 2. tačka d) i člana 70. Zakona o javnim nabavkama ("Službeni glasnik BiH", broj: 39/14 i 59/22), Pravilnika o javnim nabavkama roba, usluga i radova u Ministarstvu poljoprivrede, šumarstva i vodoprivrede broj:11-02-02-355/23 od 17.03.2023. godine, a na osnovu Preporuke Komisije za javnu nabavku u postupku javne nabavke roba Ministar poljoprivrede, šumarstva i vodoprivrede d o n o s i:

O D L U K U
o poništenju postupka javne nabavke

I

Prihvata se Preporuka Komisije za provođenje postupaka javnih nabavki broj: 01-45-1333-5/26 od 12.08.2026. godine i poništava se postupak javne nabavke putem Konkurentskog zahtjeva za dostavu ponuda broj: 01/26 za nabavku usluge „Analiza ekološkog i hemijskog stanja rijeka II kategorije na području HNŽ-K sa planom prioriteta za dostizanje najmanje dobrog stanja“ – izrada elaborata i dokumentacije, jer u postupku nije zaprimljena nijedna prihvatljiva ponuda.

II

Ova Odluka objavit će se na web-stranici Ministarstva poljoprivrede, šumarstva i vodoprivrede, u skladu sa članom 70. stav (6) Zakona o javnim nabavkama.

III

Ova Odluka stupa na snagu danom donošenja.

Obrazloženje

Postupak javne nabavke pokrenut je na prijedlog Uprave za vode Odlukom ministra broj: 01-45-1333/26 od 19.06.2026. godine, nakon provedenog istraživanja tržišta. Javna nabavka provedena je putem Konkurentskog zahtjeva za dostavu ponuda broj: 01/26. Evidencijski broj nabavke u Planu javnih nabavki Ministarstva poljoprivrede, šumarstva i vodoprivrede za 2026. godinu je USLUGE 18, a broj obavještenja o nabavci sa Portala javnih nabavki je 1243-7-21-3-2/26.

Postupak je provela Komisija za provođenje postupaka javnih nabavki za potrebe Ministarstva poljoprivrede, šumarstva i vodoprivrede HNK/Ž, imenovana Rješenjem ministra broj: 01-45-185/26 od 19.02.2026. godine. Tenderska dokumentacija objavljena je na Portalu javnih nabavki putem navedenog obavještenja o nabavci. Dana 31.07.2026. godine izvršeno je javno otvaranje ponuda. Uvidom u Izvještaj o preuzimanju tenderske dokumentacije utvrđeno je da je tendersku dokumentaciju preuzelo trinaest (13) potencijalnih ponuđača, dok je u ostavljenom roku zaprimljena jedna ponuda, i to ponuda ponuđača „Enova“ d.o.o. Sarajevo, Podgaj 14/1, 71000 Sarajevo. Ponuda je bila uredno zatvorena i blagovremeno dostavljena te je otvorena na javnom otvaranju, o čemu je sačinjen zapisnik koji je dostavljen ponuđaču.

Pregledom i ocjenom ponude Komisija je utvrdila da je ponuđač dostavio spisak ugovora o pružanju istih ili sličnih usluga (monitoring voda) realizovanih u posljednje tri godine, ali uz spisak nisu dostavljene potvrde o realizaciji ugovora koje izdaje druga ugovorna strana.

Tenderskom dokumentacijom, u okviru uslova tehničke i profesionalne sposobnosti iz člana 50. stav (1) tač. a) i c) Zakona, zahtijevano je da ponuđač dokaže da je u posljednje tri godine, odnosno od početka poslovanja ako posluje kraće od tri godine, uspješno realizovao najmanje jedan ugovor iz oblasti monitoringa voda. Kao dokaz je izričito zahtijevan spisak ugovora formiran u skladu sa članom 48. stav (2) Zakona.

Članom 48. stav (2) Zakona propisano je da se, kada ugovorni organ zahtijeva dokaz o uredno izvršenim ugovorima, dokaz podnosi u formi spiska izvršenih ugovora uz potvrdu o njihovoj realizaciji koju daje druga ugovorna strana. Ako se takva potvrda iz objektivnih razloga ne može dobiti od ugovorne strane koja nije ugovorni organ, prihvata se izjava privrednog subjekta o uredno izvršenim ugovorima uz dokaz o učinjenim pokušajima da se potvrda obezbijedi.

Ponuđač „Enova“ d.o.o. Sarajevo uz dostavljeni spisak nije dostavio potvrdu/e o realizaciji ugovora izdanu/e od druge ugovorne strane, niti iz sadržaja ponude proizlazi da je dostavljena izjava o uredno izvršenim ugovorima uz dokaze o učinjenim pokušajima pribavljanja potvrde u smislu izuzetka iz člana 48. stav (2) Zakona.

Slijedom navedenog, ponuđač nije na način propisan tenderskom dokumentacijom dokazao ispunjavanje kriterija tehničke i profesionalne sposobnosti koji se odnosi na uspješnu realizaciju najmanje jednog ugovora iz oblasti monitoringa voda. Komisija je stoga utvrdila da ponuda ponuđača „Enova“ d.o.o. Sarajevo nije prihvatljiva u smislu člana 2. stav (1) tačka l) podtačka 2) Zakona o javnim nabavkama, jer ponuđač nije dokazao ispunjavanje kriterija za kvalifikaciju privrednog subjekta na način zahtijevan tenderskom dokumentacijom.

Pravni osnov za odbacivanje ponude predstavlja član 68. stav (1) Zakona o javnim nabavkama. Kako je u predmetnom postupku zaprimljena samo jedna ponuda, a ista je nakon pregleda i ocjene utvrđena neprihvatljivom, Komisija je jednoglasno konstatirala da u postupku nema prihvatljivih ponuda i preporučila ugovornom organu poništenje postupka u skladu sa članom 69. stav (2) tačka d) Zakona.

Cijeneći sve navedeno, odlučeno je kao u dispozitivu ove Odluke.

Pouka o pravnom lijeku

Protiv ove Odluke može se izjaviti žalba u skladu sa članom 101. stav (5) Zakona o javnim nabavkama, najkasnije u roku od pet (5) dana od dana prijema ove Odluke.

Dostavljeno:

1. Ponuđaču
2. Uprava za vode
3. a/a

